

DOMINGU XVIII TEMPU KOMÚN – TINAN C

Tema

Liturjia domingu ne'e nian husu ita kona-ba atitude ne'ebé ita asume hasoru rikusoin sira mundu ne'e nian. Sasán sira-ne'e la bele sai maromak sira ne'ebé dirije ita-nia moris; no konvida ita atu deskobre no hadomi rikusoin sira seluk ne'ebé fó sentidu loloos ba ita-nia ezisténsia no garante ita moris iha plenitude.

Iha *Evanjellu*, liuhusi “ai-kanoik ema riku beik-teen”. Jezús denunsia kona-ba falénsia moris ida orienta ba de'it soin materiál: ema ne'ebé halo nune'e nia “ulun la loos/bulak” ida basá haluha buat ne'ebé loloos fó sentidu ba ezisténsia.

Iha *leitura dahuluk*, ita iha reflesaun “qohélet” nian kona-ba moris ne'ebé buka akumulasaun soin... Maski reflesaun “qohélet” nian la bá dook, nia sai pontu ida atu hahú deskoberta Maromak nian no ninia valór sira no atu hetan sentidu ikus ita-nia ezisténsia nian.

Leitura daruak konvida ita ba identifikasaun ho Kristu: ida-ne'e signifika atu husik “maromak” sira ne'ebé halo ita sai atan no atu moris fila fali beibeik, to'o ita-nia an sai Ema Foun, “Maromak nia ilas nian”.

LEITURA I – Co (Ecle) 1,2; 2,21-23

Livru Qohélet nian mak livru ida ho karáker sapiensiál, hakerek iha finál sékulu III mK. Ita la hatene sé mak autór... Iha 1,1, ita haree aprezentasaun livru nian nu'udar “liafuan qohélet nian”; maibé “qohélet” verbu “qhl” iha partisípiu signifika “ida-ne'ebé partisipa iha asembleia eh ida-ne'ebé ko'alia iha asembleia”. Naran “Eclesiastes” (“eklesiastes”) mak forma lia-latin nian tradús husi lia-gregu: nia signifikadu hanesan ho “qohélet” – “ida-ne'ebé tuur eh ko'alia iha asembleia” (“eklesia”).

“Kadernu anotasaun sira” ema matenek nian ida-ne'e, mak hakerek ida estrañu no enigmátiku, sarkástiku, inkonformista, polémiku, no tau iha kestaun dogma tradisionál sira Israel nain. Ninia preokupasaun fundamentál, liufali hatudu dalan, mak sobu serteza no seguransa sira. Nia halo pergunta maibé la preokupa liu atu buka resposta ba kestaun sira-ne'e.

Livru iha karakterístika pesimizmu nian. Autór ne'e parese nega possibilidade atu hetan sentidu ba moris... Nia defende katak ema la iha kbiit atu iha asesu ba “sabedouria”, katak la iha buat foun ida no ita hetan kondensasaun fatál atu repete dezafiu hanesan, katak ema nia esforsu hotu la vale buat ida no folin-laek, katak imposivel koñese Maromak no katak, buat naran de'it akontese, la iha buat ida mak folin tanba mate mak ita-nia rohan no halo ita hanesan de'it ho beik-teen sira no balada sira... Qohélet la'ós livru ida iha ne'ebé ita bá buka resposta sira; livru ida ne'ebé denunsia frakasu sabedouria tradisionál nian no iha laran ita rona halerik no hakilar husi umanidade kanek no lakon ne'ebé la komprende razaun moris nian.

MENSAJEN

Iha konkretu, testu ne'ebé liturjia ohin propoin mai ita, “qohélet” haklaken kona-ba esforsu mananu naran de'it ninia folin-laek. Hahú husi esperiénsia rasik, nia konklui katak, esforsu hotu ema dezenvolve durante nia moris la serve ba buat ida. Ba saida tenke haka'as an,

serbisu, preokupa atu harii buat ruma se ikusmai, ita tenke husik buat hotu ba ida ne'ebé la halo buat ida? No “qohélet” rezume ninia frustrasaun no ninia deziluzau ho refraun ne'ebé repete iha livru tomak (dala 25): “buat hotu loko-an de'it”. Konkluzau ida ne'ebé kontráriu ba sabedouria tradisionál ne'ebé apresenta ema matenek nu'udar ida ne'ebé serbisu no buka kumpre ho efikásia knaar hotu nia tenke halo.

Lisaun boot ne'ebé “qohélet” husik mai ita mak demonstrasaun kona-ba ema nia inkapasidade, atu hetan sentidu ida ba nia moris ho nia an rasik. “Qohélet” nia pesimizmu lori ita atu rekoñese ita-nia kbiit-laek, moris lahó sentidu se hateke de'it ba umanu no materiál. Livru ne'e nia reflesaun dudu ita atu hateke dook, hakat liu ita-nia orizonte sira. Hateke ba ne'ebé? “Qohélet” la bá dook; maibé ita, hodi roman fiar nian, bele foti konkluzau: ba Maromak. Iha Maromak de'it no ho Maromak de'it mak ita iha kbiit atu hetan sentidu ba moris no hakonu ita-nia ezisténsia.

LEITURA II – Col 3,1-5.9-11

Iha leitura daruak Paulo polemiza kontra “doutór sira” ne'ebé hakarak komplementa fiar iha Kristu ho koñesimentu kona-ba anju sira no ho prátika legalista no axétika sira. Paulo buka hatudu katak fiar iha Kristu (nu'udar adezaun no identifikasaun ho Kristu) natón atu to'o ba salvasaun.

Testu ne'e integra parte morál surat nian (kf. Col 3,1-4,1): Paulo foti konkluzau prátika sira kona-ba buat ne'ebé nia afirma iha parte dahuluk (katak Kristu de'it to'o ona ba salvasaun) no bolu Kolossense sira atu moris tuir vida foun ne'ebé identifika sira ho Kristu, lora ba lora.

MENSAJEN

Testu ne'ebé propoin mai ita fahe ba parte rua.

Iha primeira parte (vers. 1-4), Paulo apresenta, nu'udar pontu hahú nian no nu'udar baze metin ba vida sarani, uniaun ho Kristu moris hi'as. Sarani sira, liuhusi batizmu, identifika an ona ho Kristu ne'ebé moris-hi'as; nune'e sira mate ba salan no moris fali ba vida foun. Vida ne'e tenke buras ho modu progresivu, maibé tenke hatudu momoos, bainhira Kristu filafali.

Iha segunda parte (vers. 5.9-11), Paulo deskreve ezijénsia prátika sira identifikasuan ne'e nian ho Kristu moris-hi'as. Sarani ida tenke halo mate iha nia imoralidade, impureza, paixaun sira, hakaran aat sira, kaan-teen, iha liafuan ida, maromak falsu hotu ne'ebé hakonu ema tuan nia moris; no, husi parte seluk, tenke hatais an ho Ema Foun, hatudu “Maromak nia ilas” (sai perfeitu hanesan imi-nia Aman iha lalehan” – kf. Mt 5,48). Bainhira ida-ne'e akontese, diferensa tuan sira sei lakon, ema hotu hanesan, katak “Maromak nia ilas”. Ida-ne'e mak Kristu mai atu lori: kria comunidade ema foun sira-nian, ne'ebé iha mundu ne'e sai “Maromak nia ilas”.

Identifikasaun ho Kristu ne'ebé moris-hi'as – rezultadu Batizmu nian – mak, moris filafali beibeik to'o lori ita sai hanesan ba beibeik ho Maromak.

EVANJELLU – Lc 12,13-21

Ita kontinua halo “dalan ba Jerusalém” no rona lisaun sira ne'ebé prepara eskolante sira atu sai sasin Reinu nian. Katekze ohin nian, kona-ba atitude hasoru rikusoin sira.

Ema ida lamenta ba Jezús katak nia maun lakohi fahe ho nia limarohan. Tuir tradisaun judaika, oan mane-boot simu 2/3 husi soin sira nia aman nian (kf. Dt 21,17. Posivel katak fahe de'it sasán ne'ebé bele muda no atu konserva tomak patrimóniu família nian, uma no rai sira fó ba oan-mane boot . Mane ne'ebé interpela Jezús, karik alin ki'ik, ne'ebé seidak simu buat ida. Oinsá Jezús nia pozisaun iha kestaun ne'e nia oin?

MENSAJEN

Jezús lakohi envolve an iha kestaun direitu familiár nian hodi foti pozisaun ho alin kontra maun (vers. 14). Problema mak hahalok kaan nian, luta ba rikusoin sira, belit maka'as ba osan (karik husi parte maun no alin hotu). Konkluziun ne'ebé Jezús foti (vers. 15) esplika tansá Nia la aseita tama iha kestaun: osan la'ós fonte ba moris loos. Kaan-teen ba soin sira (hakarak iha nafatin) mak idolatria: la lori atu halo ema sai tasak. Lójika Reinu nian la'ós lójika husi ida-ne'ebé moris ba soin materiál sira; sé mak hakarak moris iha dinámika Reinu nian tenke hanoin nafatin ida-ne'e.

Ai-kanoik ne'ebé Jezús apresenta (vers. 16-21) hatudu atitude ema nian ne'ebé buka de'it soin sira ne'ebé mohu, haluha tiha buat esensiál – ida-ne'ebé fó moris nakonu. Ai-kanoik apresenta ema ida ne'ebé hatene haree dook (previdente) responsavel, serbisu-na'in (ita admira no hahí nia); maibé ho forma egoista no obsesiva (demais), nia moris de'it ba soin sira ne'ebé asegura hakmatek no moris-di'ak materiál (no iha ne'e, ita la bele ona hahí no admira). Ema ne'e reprezenta sira hotu ne'ebé buka de'it akumulula ba beibeik, hodi haluha buat seluk – inkluzive Maromak, família no ema seluk; nia reprezenta ema hotu ne'ebé moris taka-an ho soin materiál sira, halo sai sira-nia maromak pesoál no haluha tiha katak, la'ós iha soin sira mak hetan sentidu fundamentál ezisténsia nian.

Referénsia ba Maromak nia hahalok, ne'ebé hapara ninia ezisténsia egoista no laho signifikadu, serve de'it atu hatudu katak moris ida nune'e la iha sentidu no sira ne'ebé moris de'it atu akumulula soin sira, ba Maromka sira mak ema beik-teen eh "ulun la loos". Jezús hakarak dehan mai ita katak ita la bele moris hodi sai atan ba osan no rikusoin materiál, hanesan sira mak importante liu iha ita-nia moris. Preokupasaun demais ba soin sira, buka sira ho modu obsesivu, constitui esperiénsia ida egoísmu nian, taka-an nian, dezumanizasaun nian, ne'ebé impede ema atu sai disponivel no fó espasu ba valór importante sira, valór sira Reinu nian. Bainhira fuan nakonu ho kaan, ho hahalok karak nian, egoísmu, bainhira iha moris luta de'it atu soi, atu akumulula, ema sai insensivel ba maluk sira no ba Maromak; nia bele to'o hahalok esplorasau nian, halo nia maluk sai atan, halo injustisa, atu haboot nia soin sira. Nia sai foti-an no autosuficiente, la iha kapasidade atu hadomi, atu fahe, atu preokupa ho ema seluk... Nia hela iha Reinu nia ninin.

Atensaun: ai-kanoik ida-ne'e la dedika de'it ba sira ne'ebé iha soin barak; ai-kanoik ne'e ba ema hotu (iha soin barak ka uitoan) maibé moris preokupa de'it ho soin sira, orienta sira nia moris atu iha no halo rikusoin materiál sai sira-nia maromak ne'ebé kondisiona sira-nia moris no sira-nia hahalok sira.